

Beschlußredt dieser vorangezeigter Kriegs Ordnung.

Nachdem in der Vorrede die Alten Kriege ein wenig an-
gezogen/ so muß ich weither gedenccken dieser Zeitigen
zeit vnd Nationen. Man liest in den Alten Geschichten
vnd Historien/ in was hohen vnd rümlichen Ehren unsere Vor-
ältern (die hohen Teutschen (als im Röm. Keyserthum/ Reichs
Fürstenthumben/ vnd andern benachbarten Königreichen/ vnd
alle/ so der Teutschen Nation zugehörig/ vor viel hundert Ja-
ren/ zum Streit oder in Kriegsleufften/ vor dapffere/ Manns-
hafftige Helden beruffen/ geehret/ vnd dermassen Lob vnd Preis
gehabt/ daß Keyser/ Könige/ Fürsten vnd Herren/ ihre sonder-
liche Freude/ liebe vnd lust/ an der Teutschen geschickligkeit/
Freimütigem anlauffen vnd durchbrechens/ die Feinde getrost
anzugreifen/ geschehen haben.

Item/ so haben sie auch allezeit mit Trawen/ Glauben vnd
Warheit vmbgangen/ nach Ehren vnd guttem namen getrach-
tet/ Göttlich leben vnd die Gerechtigkeit lieb gehabt/ als die bes-
te Christenheit in Gottseligem wandel verhalten/ was einer
dem andern hat zugesagt/ das ist ja vnd nein mit trawen vnd
glauben gehalten worden. Es ist auch bey den Teutschen kein
höher noch grosser pfandt zuuersehen gewesen/ den Kriegmans
oder Landsknechts glauben/ darzu haben sie sich auch besser mit
Kriegsrüstung versehen vñ staffiert/ als man jetzt thut/ hat man
sie an die Feinde gefüat/ so ist es mit freiem muth/ auß vnuerzag-
tem herken zugangen. Wie man dann in alten Büchern beschrie-
ben stehet/ von trefflichen Schlachten auff dem Meer/ zu Was-
ser vnd Lande geschehen/ vnd offtmals so vnzalbar Volck/ auff
der Wallstat geblieben ist.

Ferner/ so hat auch die gemeine Oberkeit vor alten Jahren/
hohen Potentaten zu dienst/ nutz vnd ehren/ zu bewarung Land
vnd Leut zum besten/ alle Landeschafften/ Stett/ Flecken vnd
Dörffer/ deßgleichen die Ritterschafft/ den Adel/ alle Amptleue

v

vnd